

Scola in tema er tar ils rapports da gestiun

Cussegl grond ha tractà ils rapports da gestiun

■ **(anr/fa) Il parlament grischun ha approvà unanimamain ils rapports da gestiun da las dretgiras grischunas. Da diesch rapports dad uffizis ed interpretas cun participaziun dal chantun ha'l prendì enconuschientscha.** Sco usità da primavaira a chaschun da la sessiun da zercladur ha tractà il parlament ier ils rapports da gestiun. I sa tracta qua dals differents uffizis ed interpretas, als quals il chantun è participà. Ils rapports da gestiun da la dretgira chantunala e la dretgira administrativa sco era quels da la cumissiun da surveglianza da las advocatas e dals advocats e da la cumissiun da notariat ha acceptà il cussegl grond cun 96:0 vuschs. Cun tractar il quint statal 2015 chantunal aveva il parlament approvà ils quints da las duas dretgiras cun 115:0 vuschs.

Numerus cas da giurisdicziun gratuita

Il budget 2015 da la dretgira chantunala preveseva in surpli da sortidas da 4,3 milliuns francs. Cun bundant 3,9 milliuns francs ha il quint però serrà cun in minus per bundant 323 000 francs pli pitschen che previs. Quai è stà pussaivel grazia ad expensas main grondas tar las posiziuns «Indemnisaziuns per ils actuars ad hoc» e «Pajas dals actuars e da l'ulteriur personal da la chanzlia». Influenzà il quint han numerus cas da la giurisdicziun gratuita, ils quals van a quint da la cassa da la dretgira. Era tar il quint da la dretgira administrativa è resultà tar

sortidas da bundant 3,3 milliuns francs ed entradas da bundant 600 000 francs in surpli da sortidas da passa 2,7 milliuns francs. Quai signifitga in minus ch'è per bundant 200 000 francs pli pitschen che previs, surtut causa stgars 184 000 francs damain sortidas en il sector da l'elavuraziun electronica da datas.

Per gronda part senza debatta

Senza debatta ha il cussegl grond prendì enconuschientscha dals rapports da gestiun da l'Assicuranza d'edifizis e da la Cassa per donns elementars chantunals, da la Banca Chantunala Grischuna, da la Grischelectra, dals Servetschs psichiatricis grischuns, dal Center da furnaziun per sanadad e fatgs socials, da la scol'auta HTW, da la Cassa da pensiun chantunala e da l'Institut d'assicuranza sociala dal Grischun. En connex cun il rapport da gestiun da la Scol'auta pedagogica dal Grischun (SAP) dentant hai dà dus votums: «Quantas persunas frequentan il studi da pedagogia curativa a la SAP», ha dumandà *Cornelia Märchy-Caduff* (pcd, Razén) ed era vuli savair sch'ils students possian vegnir obligads suenter la scolaziun dad instruir l'emprim in tschert temp en Grischun avant che surprender piazzas en auters chantuns. Tant ella sco er *Elisabeth Mani-Heldstab* (pbd, Tavau) han dumandà cusseglier guvernativ *Martin Jäger* quantas persunas che

instrueschian senza avair la scolaziun necessaria.

Interess per la professiun dal scolast è detg grond en Grischun

«Actualmain fan 24 studentas e students il studi da pedagogia curativa», ha respus Jäger. Areguard ils permiss d'instruir en il sector da pedagogia curativa e sin il stgalim aut per persunas senza la scolaziun necessaria ha'l infurmà che quellas dumondas s'hajan baingea augmentadas ils ultims onns sin 353 permiss. «Bliers da quels èn però per pensums fitg pitschens, be da var sis lezziuns.» El ha menziunà en quel connex la situaziun speziala da las scolas rumantschas: «Quellas han savens gronda fadia da chattar persunas d'instrucziun che san bain avunda ils idioms regionalis per instruir en rumantsch.» Sco ch'il cusseglier guvernativ ha cuntinuà nun exista nagina pussaivladad dad obligar ils students dad instruir l'emprim en Grischun. Jäger ha constatà ch'il dumber dad umens che vulan daventar scolasts s'haja augmentà l'ultim onn da 19 sin 25 pertschient, «quai è dapli che la media svizra». Ina remartga hai dà era tar il rapport da gestiun da la Viafier retica (VR): «Il pontenzial turistic da la VR fiss grond, quai vesan ins era tar autras viafiers en Svizra», ha ditg *Rico Stiffeler* (pbd, Tavau), «la VR ed era Grischun Vacanzas pudessan trair a niz pli ferm quest'attracziun turistica che quai ch'ellas fan.»